



Siverth K. Heilmann

UKA 2022/175

Atassut

22. November 2022

Apeqquteqaat aallaavigalugu oqallisissiaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?

(Inatsisartuni ilaasortaq, Mariane Paviasen, Inuit Ataqatigiit)

Siullermik apeqquteqaat aallaavigalugu oqallisissiaqartumut qujanaq, imatullu Atassummiit oqaaseqarfigissavarput.

Aatsitassat pillugit inatsisartut inatsisaat ilaatigut 2005 – 2009 akornanni Naalackersuisooqataasutut soorunami partiinit tamanit peqataaffigineqarluarluni inaarsarneqarpoq. 2009-imilu Naalackersuisut nikinneri IA-p Naalackersuisuuffik tiguvaa, matumalu kinguninngua inaarutaasumik akuersissutigineqarpoq. Aap aatsitassarsiorup annertusarneqarnissaanut aningaasarsiorfissat suliffissatigullu isumalluarnerput annertusimavoq.

Tamatsinnik ilisimaneqarpoq, Nunatsinni aatsitassarsiorfiusinnaasunik peqartoq, tamakkuli qulakkeerniarnerinnaanut misissueqqissaarnernullu aningaasarpasuit piginngisagut avataaniik aningaasaleerusuttunik saaffiginnittoqartarneragut, Naalackersuisut piumasaqaatitsinnut naammassinnissimasunut akuersisinnaanerata alloriarfiusarpoq.

Nunatsinni aatsitassarsiortoqassappat, nunaqavissunik sulisoqarnissamut piumasaqaatit qulakkeerneqarsimanissaat piumasaqaataasunut ilaavoq, kiisalu Sisimiuni aatsitassanut ilinniarfeqalernissaa angusimasatsinnut aatsitassarsiornissallu ineriartorneranut pingaarutillit ilagiinnarpaat. Aap aatsitassarsiorfinnik aallartittoqartarpoq aningaasarsiornitsinnullu iluaqutaasumik, taamaakkalluarterli aamma nunaqavissunik sulisoqarniarnermut piumasaqaatigut, nammineq Nunatsinniik naammatsineq ajorneri arajutsisimaneqanngillat.

Aalisagaanngitsunik annertuumik isaatitsiffeqalernissamik isumalluarnerujussuullu oqarluartaartoqartarsimanerarlugu allaallu peqqusiileqinartut neriulussinnartutullu oqallisissiaqartup oqartuuteqarnera paasiuminaatsilluinnarlugu nassuerutigissavara. Partiit allat neriulussinnarnernut pisuutissa-gaanni akikippallaarpoq.

Atassummiit inuussutissarsiutitta pingaarnersaat aalisarnermi suli annertunerusumik aalisartortatta aningaasarsiornerulernissaanut periarfissat annertusartuarnissaanut, nunamilu suliffissanik periarfisiiniarnerput annertoqisunik, politikikkut tapersiisoqarnerusartuuppat, ila massakut innuttaasut politikkerillu aningaasat pisariaqartitaannut aningaasassaqaarnerput pitsaanerujussuussagaluarpoq. Taamaattumik aningaasarsiorfiusinnaasut suliffissallu ataavartut pilersinniarnernut, kiisalu sulerusussuseqartitsinissamut Atassummiit oqariartutiguakkatsinnut tapersorsorneqarnerunissarput pisariaqartipparput. Qangaaniilli Narsaq Narsallu eqqaani aatsitassarsiornerup iluani aningaasarsiorfissarpassuarnik oqallisigineqartuutunik peqarfeqarnera aporfilersuinnarani paaseqatigiinnerunis-sarpulli tamatta pisariaqartipparput.

Oqallisissiaqartumik tunngavilersuutigineqartut tamaasa oqaaseqarfiginiangilakka, inatsisartummi piumasaqaatit sakkortuunik Naalakkersuisunut pisinnaatitaaffeqarput, ilaatigut pingaarnerpaatullu inunnut, pinngortitaq avatangiisinullu navianaataasinnaanera il il qulakkeersimaneqarnissaa.

Aningaasarsiorfiusinnaasut aatsitassarsiornerinnaangikkaluanut Atassutip tikkuartuiuarneranut tusaaneqarnerunissarput pisariaqartipparput, nunarput pillugu qinikkatut sulivugut, unaaraannanguaq isiginagu, ungasissumut isigaluni aporfissalersuinani nunatta ineriartortinnissaanut suleqati-giitta.

Qujanaq.